



REPUBLIKA E SHQIPËRISË

**UNIVERSITETI “ISMAIL QEMALI” VLORË  
FAKULTETI I SHKENCAVE TEKNIKE  
DEPARTAMENTI I BIOLOGJISË**

**RREGULLORE E PROGRAMIT TË CIKLIT TË  
PARË TË STUDIMIT**

**BACHELOR në “BIOLOGJI”**

**Miratoi  
DREJTUESI I NJËSIË BAZË  
Dr. Aurora Bakaj**

**Dhjetor , 2019**

## **PËRMBAJTJA**

### **KREU I: DISPOZITA TË PËRGJITHSHME**

*Neni 1: Baza ligjore*

*Neni 2: Misioni i programit të studimit*

*Neni 3: Objektivat formues të programit*

*Neni 4: Misioni i rregullores së programit*

### **KREU II: ORGANIZIMI I PROGRAMIT TË STUDIMIT**

*Neni 5: Programi i studimit*

*Neni 6: Pranimi i studentëve në Programin e Ciklit të Parë të studimeve Bachelor në “Biologji”*

*Neni 7: Ndërprerja e studimeve*

*Neni 8: Transferimi i studimeve, njohja e krediteve dhe ekuivalentimi i lëndëve*

### **KREU III: RREGULLAT E NDJEKJES NE PROGRAMIN E STUDIMIT DHE PROCEDURAT E DIPLOMIMIT**

*Neni 9: Frekuentimi dhe shlyerja e detyrimeve të lëndëve*

*Neni 10: Rregullat e zhvillimit të provimeve dhe vlerësimi i lëndës*

*Neni 11: Sistemi i vlerësimit*

*Neni 12: Administrimi i dokumentacionit të provimeve*

*Neni 13: Ankimi për rezultatin përfundimtar*

*Neni 14: Përmirësimi i notës*

*Neni 15: Diplomimi*

*Neni 16: Procedura e provimit të diplomës*

*Neni 17: Pajisja me diplomë*

*Neni 18: Tërheqja e diplomës*

### **KREU IV: TE DREJTAT DHE DETYRIMET E STUDENTEVE**

*Neni 19: Të drejtat e studentëve*

*Neni 20: Detyrimet e studentëve*

*Neni 21: Përgjegjësi të tjera të studentëve*

*Neni 22: Masat disiplinore për studentët*

### **KREU V: KOMUNIKIMI**

*Neni 23: Rregullat e sjelljes akademike*

*Neni 24: Normat etike gjatë komunikimit Personel Akademik – Student*

*Neni 25: Çështje akademike*

*Neni 26: Çështje jo akademike*

### **KREU VI: DISPOZITA KALIMTARE DHE TË FUNDIT**

*Neni 27: Rishikimi dhe përditësimi*

# **KREU I**

## **DISPOZITA TË PËRGJITHSHME**

### **Neni 1**

#### **Baza ligjore**

Kjo rregullore bazohet në Ligjin Nr. 80/2015 “Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë”, Udhëzimin e MASR për çeljen e Programeve të Studimit, Statutit (2019) dhe Rregullores (2014) të Universitetit “Ismail Qemali“ të Vlorës.

### **Neni 2**

#### **Misioni i programit të studimit**

Misioni i Programit Bachelor në “Biologji” është të pajisë studentët me njohuri të përgjithshme dhe specifike biologjike në disiplinat bazë si: Biologjia Molekulare dhe Biologjia e Ruajtjes të cilat do të shërbejnë për të formuar studentët me një kulturë të përgjithshme dhe profesionale gjatë procesit të mësimdhënies si dhe implementimit të njohurive të tyre në fusha të përafërta. Departamenti është i përkushtuar për përmbushjen e këtij misioni, me synim sigurimin e përvojave arsimore, edukative e shkencore cilësore, në mënyrë që t'i aftësojë studentët të arrijnë një zhvillim të plotë intelektual, profesional e shoqëror në tregun e punës.

Misionin e tij mësimdhënës dhe shkencor, programi i studimit Bachelor në “Biologji”, e orienton në këto dy fokuse kryesore:

1. Përgatitja e Biologëve të rinj të aftë për drejtimin e procesit të mësimdhënies si dhe formimin e ekspertëve në fushën e kërkimit shkencor mjedisor.
2. Ngritja e kërkimit shkencor në nivelet bashkëkohore duke i shërbyer procesit të mësimdhënies si dhe ngritja e bazës së të dhënave që i shërbejnë kërkimit shkencor.

### **Neni 3**

#### **Objektivat formues të programit**

#### **Objektivat e Programit Bachelor në Biologji janë:**

1. Sigurimi i përvojave arsimore e shkencore cilësore për studentët, në mënyrë që të aftësohen për të arritur një zhvillim të plotë intelektual, profesional e shoqëror.
2. Çdo student të arrijë me edukimin e tij një plotësim të kënaqshëm të vetvetes, në mënyrë që të japë kontribut të vlefshëm në profesionin e tij.
3. Të sigurohet një mjedis pozitiv i të nxënësve si dhe një proces mësimdhënies rezultativ që evoluon vazhdimisht.
4. Mësimdhëniet të jetë e mirëplanifikuara, në mënyrë që të lehtësojë procesin e të nxënësve, si dhe të mundësojë shkëmbimet e ideve e bashkëpunimin e studentëve.

5. Stafi të përmirësohet vazhdimisht në funksion të programit, përmes zhvillimit të tij profesional, duke rritur aftësitë e tij mësimdhënëse e shkencore.
6. Stafi të përdorë mjete dhe strategji inovative që rrjedhin nga transferimi i teknologjisë për procesin e edukimit dhe kërkimit shkencor.
7. Të zhvillohet një kurrikul bashkëkohore në një mënyrë motivuese, progresive e stimuluese për të gjithë nivelet e studentëve.
8. Studentët të fitojnë një sërë njohurish praktike nëpërmjet përdorimit të laboratorëve si dhe punës me terrenin.
9. Studentët të përfitojnë njohuri mbi përpunimin e informacionit, shkrimin akademik si dhe aftësi të prezantimit të dijeve të tyre në publik.
10. Studentët të jenë të aftë të japin gjykimin e tyre për aspekte të prolematikave shkencore mjedisore.
11. Studentët të fitojnë njohuri, aftësi dhe shprehje profesionale me përmbylljen e ciklit të parë të studimit “Biologji”, për t’u përballur me tregun aktual të punës në vend, si në institucionet publike dhe në ato jopublike.

#### **Neni 4**

#### **Misioni i rregullores së programit**

- a) Misioni i Rregullores së Programit Bachelor në “Biologji” është realizimi i veprimtarisë mësimore, kërkimore-shkencore dhe administrative të Departamentit të Biologjisë në përputhje me synimin e objektivat e programit të studimit Bachelor në “Biologji”. Rregullorja, gjatë zbatimit të saj, ka nevojë për korrektesën profesionale të stafit, që lidhet me mësimdhënien e kërkimit shkencor, si dhe bashkëpunimin me të gjithë grupet e tjera të interesit, studentë, subjekte kontraktore etj. Të gjithë aktorët, objekt i kësaj rregulloreje në hartim dhe plotësim, kanë të drejtë të zbatojnë instrumentet saj.

Rregullorja ka këto qëllime:

- b) Të krijojë një kuadër të plotë dhe të qartë për studimet e programit të studimit të ciklit të parë të studimit Bachelor në “Biologji”, si dhe të përcaktojë rregulla standarte të përgatitjes dhe organizimit akademik për studentët e këtij cikli.
- c) Të orientojë, koordinojë dhe bashkërendojë funksionimin institucional të Departamentit të Biologjisë si pjesë e Fakultetit të Shkencave Teknike.

### **KREU II**

### **ORGANIZIMI I PROGRAMIT TË STUDIMIT**

#### **Neni 5**

#### **Programi i studimit**

Programi i studimit Bachelor në “Biologji” siguron Diplomë Universitare Bachelor në “Biologji”. Ky program organizohet dhe shprehet përmes grumbullimit të krediteve sipas Sistemit European të Transferimit të Krediteve (ECTS). Për të fituar këtë diplomë nevojiten 180 kredite (ECTS), ku 60 kredite (ECTS) përfaqësojnë ngarkesën e punës së një viti akademik studimesh.

- a) Viti akademik është njësia kohore bazë e studimeve. Një vit akademik përbëhet nga 2 semestra dhe shtrihet në intervalin nga 30 deri 40 javë mësimore, sipas udhëzimeve MASR (30 javë mësim

- dhe 6-8 javë provime dhe provim formimi / mbrojtje teze diplome). Fillimi dhe përfundimi i vitit akademik përcaktohet me Udhëzim të MASR në fillim të çdo viti akademik.
- b) Çdo semestër zgjat 15 javë për mësim dhe mesatarisht 3-4 javë për provime. Organizimi i vitit akademik, datat e fillimit të semestrave dhe sezoni i provimeve, shpallen nga Rektori në fillim të vitit akademik.
  - c) Me fillimin e vitit akademik, Departamenti shpall orarin mësimor: ditën, orën, sallën dhe personelin akademik përkatës për semestrin përkatës.
  - d) Në fillim të çdo viti akademik, mbështetur në kurrikulat e programeve të studimit, Departamenti përcjell për miratim planin mësimor tek Dekani i Fakultetit dhe Rektori. Për çdo kurs hartohen programet mësimore (syllabuse).
  - e) Moduli themelor i studimit është lënda semestrare me kredite (ECTS) të bashkangjitura në planin mësimor të miratuar të programit të studimit.
  - f) Numri i caktuar i krediteve fitohet pas përfundimit me sukses të disiplinës, siç është përshkruar në këtë Rregullore dhe në Rregulloren e Brendshme të Universitetit.
  - g) Vlerësimi i studentëve bëhet nga personeli akademik përkatës, që zhvillon disiplinën mësimore, i cili organizon sipas gjykimit të tij kontrolle me gojë, me shkrim, ose i kombinuar me shkrim dhe me gojë, detyra të pavarura, detyra kursi etj, në përputhje me mënyrat e vlerësimit të përcaktuara në këtë Rregullore dhe në Rregulloren e Brendshme të Universitetit.
  - h) Studenti përfundon studimet në programin e studimit Bachelor në “Biologji” dhe merr diplomë kur ka likuajduar me sukses gjithë disiplinën mësimore të parashikuara në planin mësimor përkatës, ka mbrojtur me sukses tezën e diplomës / provimin e formimit, kjo në varësi të notës mesatare që arrin studentin gjatë tre viteve të studimit, dhe ka fituar 180 kredite (ECTS). Këto dy forma vlerësimi përmbajnë tematikën e lëndëve të drejtimit që ka ndjekur në program, me qëllim krijimin dhe vlerësimin e dijeve të fituara në disiplina të ndryshme.

i. Tematika e temës së diplomës

Teza e diplomës mund të jetë bibliografike, kërkimore apo dhe kombinim i të dyjave për çështje, që lidhen me disiplinën mësimore të planit mësimor të programit të studimit Bachelor në “Biologji”. Një student mund të propozojë vetë një temë diplome dhe ta hartojë atë, me kushtin që të marrë miratimin e pedagogut udhëheqës. Teza e diplomës duhet të jetë personale. Miratimi i udhëheqësit të diplomës dhe fushës së studimit bëhet në Departament me propozim të udhëheqësit, pasi ky i fundit ka diskutuar me studentin.

ii. Forma dhe volumni i tezës së diplomës

Punimi i diplomës për ciklin e parë të studimit Bachelor në “Biologji” duhet të ketë një numër faqesh jo më pak se 30 faqe dhe jo më shumë se 50 faqe. Kriteret e punimit të temës së diplomës dhe formati i saj duhet të jetë konform Vendimit të Këshillit të Fakultetit me Nr. 190 Prot datë 02.07.2014.

iii. Diagrama kohore

Studenti që ka të drejtë për tu diplomuar, në fillim të semestrit përkatës, por jo më vonë se java e dytë, aplikon në sekretari për temë diplome duke plotësuar një formular ku propozon udhëheqësin e temës së diplomës. Ky i fundit miratohet nga Drejtuesi i Njesisë Bazë jo më vonë se java e katërt. Udhëheqësi i diplomës dorëzon një deklaratë ku të dy palët (udhëheqësi dhe studentin) kanë rënë dakort për të punuar së bashku mbi fushën e studimit të përzgjedhur, jo më vonë se java e tretë e semestrit. Afati i dorëzimit të temës së diplomës të përfunduar është një javë para datës së provimit të diplomës.

iv. Detyrime të pedagogut udhëheqës

- Të dorëzojë në kohë propozimet për studentët që merr përsipër të udhëheqë, si dhe fushën e studimit.
  - Orientime dhe takime këshilluese në periudha të rregullta kohore me studentët, për t'u ofruar studentëve udhëzime për shkrimin dhe mbrojtjen e temës si dhe për vlerësimin e saj.
- v. *Vlerësimi*
- Tema e diplomës vlerësohet me sistemin prej dhjetë notash përpara një komisioni të ngritur në Departament.
- i) Kohëzgjatja maksimale e studimeve nuk mund të jetë më shumë se dyfishi i kohëzgjatjes normale të studimit që parashikon programi, pa marrë në konsideratë periudhën kur student i ka pezulluar studimet. Studenti mund të përfundojë studimet e plota dhe të mbrojë diplomën, brenda afatit të rregullt të studimeve ose tej kufirit që parashikon ky afat, por duke iu nënshtruar detyrimeve që lindin nga kohëzgjatja e studimeve përtej kohës normale.
- j) Në fillim të çdo viti akademik, mbështetur në planet mësimore të miratuara për vitin akademik për çdo program studimi, bazuar në burimet njerëzore të brendshme dhe të jashtme që ofron Departamenti/ Fakulteti/ Universiteti dhe në varësi të kushteve të tjera, Departamentet hartojnë planin mësimor të sugjeruar të vitit akademik, i cili miratohet nga Dekani i Fakultetit.
- k) Kohëzgjatja e orës së mësimi është 50 minuta.

## Neni 6

### Pranimi i studentëve në Programin e Ciklit të Parë të studimeve Bachelor në “Biologji”

Pranimi i studentëve në Programin e Ciklit të Parë të studimeve Bachelor në “Biologji”, në Universitetin “Ismail Qemali” Vlorë, realizohet bazuar në nenin 74, të Ligjit Nr. 80/2015, “Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë”, në udhëzimet e përvitshme të Ministrisë së Arsimit Sportit dhe Rinisë, në vetë kriteret e parashikuara në nenin 39 të rregullores së UV si dhe në kriteret e propozuara nga njësitë bazë dhe të miratuara nga S.A. i Universitetit të Vlorës.

## Neni 7

### Ndërprerja e studimeve

Studenti mund të ndërpresë studimet në çdo kohë të vitit, për një afat jo më tepër se një vit dhe vetëm për këto raste:

- a) Kur sëmuret për periudha të gjata, të dokumentuara me raport nga komisioni mjeko-ligjor, ku të jenë shprehur qartë diagnoza e rekomandimi ( jo nga mjeku i familjes).
- b) Kur mbetet kryefamiljar, në raste fatkeqësish e në kushte ekonomike të vështira, të dokumentuara nga zyrat përkatëse.

Në çdo rast dokumentat duhet të paraqiten përpara se të ndërpresë studimet, të shoqëruara me një kërkesë drejtuar Rektoratit.

Studentët të cilët ndërpresin studimet për dy ose më shumë semestra radhë dhe nuk kanë marrë lejen nga Rektori për këtë ndërprerje duhet të aplikojnë përsëri për ripranim në Universitet mbështetur në rregulloren e Universitetit “Ismail Qemali” Vlorë.

Ndërprerja e studimeve, me miratimin e organit përkatës, quhet e justifikuar dhe nuk llogaritet në vitet e përsëritura. Çdo ndërprerje e pajustificuar dhe e pa merituar është e barasvlershme me mosparaqitjen në procesin mësimor dhe viti konsiderohet si vit përsëritje.

### **Neni 8**

#### **Transferimi i studimeve, njohja e krediteve dhe ekuivalentimi i lëndëve**

Është e mundur njohja e plotë dhe e pjesshme e krediteve të studentëve që vijnë me transferim nga programe të tjera studimi brenda ose jashtë Universitetit. Pranë Departamentit ngrihet Komisioni i Njohjes dhe Ekuivalentimit të lëndëve i cili vlerëson dokumentacionin e studentit të përcjellë nga Sekretaria Mësimore dhe bën njohjen e krediteve përkatëse për disipinat mësimore të likujduara. Modalitetet dhe procedurat për transferimin e studentëve janë të përcaktuara në Kreun VI të Rregullores së Brendshme të Universitetit.

### **KREU III**

#### **RREGULLAT E NDJEKJES NE PROGRAMIN E STUDIMIT DHE PROCEDURAT E DIPLOMIMIT**

### **Neni 9**

#### **Frekuentimi dhe shlyerja e detyrimeve të lëndëve**

- a. Frekuentimi i orëve mësimore është i detyrueshëm deri në masën 75%.
- b. Numri i mungesave të lejuara përlllogaritet për gjithë semestrin përkundrejt numrit total të orëve për gjithë kursin dhe jo në bazë të orëve që i takojnë provimeve të pjesshme.
- c. Çdo pedagog pajiset me regjistrin përkatës i cili përmban informacion mbi veprimtarinë e mësimdhënies dhe frekuentimit. Pedagogu përgjigjet drejtpërdrejt për saktësinë e informacionit mbi frekuentimin.
- d. Studentët e ciklit të parë të studimeve regjistrohen në lëndët që ofrohen në atë sezon sipas planit mësimor të sugjeruar, në të cilat nuk është regjistruar asnjëherë më parë.
- e. Nëse studenti mungon gjatë zhvillimit të kursit dhe tejkalon numrin total të mungesave të lejuara për gjithë semestrin ( jo më pak se 75 % frekuentim), atëherë studenti skualifikohet për shkak të mungesave, nuk futet në provimin e radhës, në procesverbalin e vlerësimit shënohet mungesë (m) dhe përsërit kursin në semestrin e ardhshëm kur kursi ofrohet. Shënimi mungesë (m) do të pasqyrohet në procesverbalet përfundimtare nëse studenti ka plotësuar mungesat totale.
- f. Nëse studenti ka frekuentuar kursin por nuk paraqitet në provimin e radhës, në procesverbalin e vlerësimit shënohet "Np - Nuk u paraqit". Nëse studenti nuk ka detyrime frekuentimi, por nuk është paraqitur në asnjë prej provimeve të pjesshme duke përfshirë dhe provimin final, në procesverbalin përfundimtar të vlerësimit do të bëhet shënimi "NP" (Nuk u paraqit), në të kundërt do të bëhet vlerësimi me notën përkatëse. Studentët nuk kanë detyrimin dhe nuk mund të regjistrohen në këto lëndë për të ndjekur kursin si përsëritës, por kanë të drejtën të shlyejnë lëndën vetëm me provim final, sipas përcaktimeve në këtë rregullore.
- g. Sekretaria mësimore e Departamentit të Biologjisë përgjigjet për administrimin e informacionit mbi detyrimet akademike të studentëve në këtë program studimi.

### **Neni 10**

#### **Rregullat e zhvillimit të provimeve dhe vlerësimi i lëndës**

Bazuar në nenet 60-65 të Rregullores së Universitetit "Ismail Qemali" Vlorë:

- a) Kontrolli i dijes së një lënde (provimi) përcaktohet nga titullari i lëndës dhe mund të bëhet, me shkrim, me gojë ose i kombinuar me shkrim e me gojë, duke u mbështetur në programin mësimor.
- b) Kontrolli i dijeve në këtë program studimi në ciklin e parë realizohet përgjatë semestrit nëpërmjet një provimi të pjesshëm, një provimi final gjithëpërfshirës si dhe formave të tjera të vlerësimit (detyrë kursi, kolekume, vlerësim në seminare etj), nëse janë parashikuar në syllabus-in e lëndës.
- c) Orari i provimeve finale duhet të shpallet para përfundimit të semestrit. Për semestrin e verës dhe sezonin e riprovimeve të dimrit kontrolli i dijeve realizohet vetëm nëpërmjet një provimi final.
- d) Rregulla apo specifika të provimeve, pesha (përqindja) e secilit provim apo detyrë në vlerësimin përfundimtar, literatura, temat ose pjesët e programit të lëndës për çdo provim, dita apo java e provimit, ora dhe salla e zhvillimit, referencat e konvertimit të pikëve në notë etj., përcaktohen në syllabus-in e lëndës të hartuar nga pedagogu dhe u bëhet i ditur studentëve që ndjekin atë kurs.
- e) Pesha (përqindja) e provimit të pjesshëm, të jetë nga 25-30% e vlerësimit të përgjithshëm dhe zhvillohet jo më larg se java e shtatë, ndërsa 10-15% e vlerësimit të përgjithshëm mund të bazohet në detyrat e kursit, projektet individuale, apo forma të tjera të vlerësimeve gjatë vitit, të gjitha së bashku.
- f) Në rastin kur studenti nuk merr pjesë në një provim, por paraqet dokumentacion ku justifikon arsye të forta si probleme shëndetësore serioze (psh. shtrim në spital, aksident të rëndë), raste të jashtëzakonshme fatkeqësish familjare, apo raste urgjencash publike, vendimin për një mundësi tjetër për dhënien e provimit e merr Dekani i Fakultetit të Shkencave Teknike, duke u bazuar në kërkesën me shkrim të paraqitur nga studenti. Dekani ka të drejtë të kërkojë dokumentacion shtesë për të verifikuar mungesën.
- g) Kurset janë të gjitha semestrare. Nëse studenti nuk kualifikohet, pra ka shënim mungesë (m) në procesverbalin përfundimtar të kursit, ai ka të drejtën dhe detyrimin ta frekuentojë përsëri atë kurs, në semestrat pasardhës kur kursi ofrohet. Nëse kursi për arsye të ndryshme nuk do të ofrohet më (p.sh për arsye të ndryshimeve në kurrikula), studenti ka të drejtë të frekuentojë atë kurs që mund të ekuivalentohet me kursin që nuk ofrohet më, ose në rast të kundërt hapet kursi që nuk ofrohet më pavarësisht numrit të studentëve, vetëm për studentët që janë brenda afatit maksimal të studimeve të tyre, në zbatim të Vendimit të Senatit Akademik Nr. 10, dt. 07.02.2019. Krahas kurseve të përcaktuara në planet semestrare, studenti ka të drejtë të frekuentojë njëkohësisht edhe kurse të tjera për të cilat ka shënimin mungesë (m) nga semestrat paraardhës, por duke respektuar rregullat e numrit të krediteve të regjistruara në një semestër dhe rregullat e përgjithshme të regjistrimit, sipas nenit 77 të Rregullores së Universitetit "Ismail Qemali" Vlorë.
- h) Tezat e provimit në të gjitha kontrollet hartohen nga titullari i lëndës. Kompromentimi i tezës është përgjegjësi direkte e pedagogut.
- i) Pas përfundimit të çdo provimi apo formave të tjera të kontrollit të dijeve, rezultatet editohen në sistemin elektronik të Universitetit "Ismail Qemali" Vlorë, jo më vonë se 48 orë nga data e zhvillimit të tij. Nëse pedagogu zhvillon provime të njëpasnjëshme për secilën prej tyre duhet të respektohet 48 orëshi. Një ditë pas shpalljes së rezultateve, pranohen dhe vlerësohen ankesat e studentëve dhe në mbyllje të këtij procesi, printohet procesverbali nga sistemi, firmoset nga lektori dhe dorëzohet në sekretarinë mësimore. Në rast se pedagogu në mënyrë të pajustificuar, nuk ka edituar rezultatet e provimeve në sistem, konsiderohet shkelje akademike, për të cilën Drejtuesi i Njësisë Bazë dhe Dekani i Fakultetit marrin masat disiplinore. Editimi i rezultateve do të bëhet në përputhje me procedurat e përcaktuara në rregulloren e Universitetit.
- j) Në raste paqartësish, studentët kanë të drejtë të shikojnë personalisht tezën e provimit në prani të lektorit të kursit, për të marrë sqarimet e duhura. Për sqarime të mëtejshme ata kanë të drejtë t'i drejtohen me shkrim Drejtuesit të Njësisë Bazë që mbulon kursin përkatës.



- k) Kur studenti në provim vlerësohet me notën 4 (katër) ose "NP" (Nuk u paraqit), ai ka të drejtën të regjistrohet për të shlyer këtë lëndë në semestrin e verës dhe sezonin e riprovimeve në dimër.
- l) Regjistrimi në këtë rast do të bëhet sipas rregullit të përgjithshëm të regjistrimit të përcaktuar në nenin 77 të rregullores së Univeritetit "Ismail Qemali" Vlorë.
- m) Mesatarja e studentit llogaritet si mesatare e ponderuar. Shuma e prodhimit të notave përfundimtare me kreditet përkatëse të lëndës pjestohet me totalin e krediteve. (Bazuar në Statutin e Universitetit "Ismail Qemali" Vlorë neni 68, miratuar nga Senati Akademik me Vendim nr.57,
- n) datë 06.09.2018, i ndryshuar me vendim Nr 75, datë 19.11.2018, vendim Nr 5 datë 04.02.2019, vendim Nr 11, datë 27.02.2019,).

Universiteti "Ismail Qemali" Vlorë, akordon për studentët në përfundim të studimeve titujt e nderit në tre nivele, në bazë të mesatares së përgjithshme të notave si më poshtë:

1. 8.00-8.89, "*cum laude*"
2. 8.90-9.39, "*magna cum laude*"
3. 9.40-10.00, "*summa cum laude*"

Këta tituj lëshohen së bashku me diplomën universitare të fituar nga studenti.

## **Neni 11**

### **Sistemi i vlerësimit**

Bazuar në Statutin e Universitetit "Ismail Qemali" Vlorë neni 68, miratuar nga Senati Akademik me Vendim nr.57, datë 06.09.2018, i ndryshuar me vendim Nr 75, datë 19.11.2018, vendim Nr 5 datë 04.02.2019, vendim Nr 11, datë 27.02.2019, Rregullores së Universitetit "Ismail Qemali" Vlorë, neni 60, shkalla e përvetësimit të programit mësimor vlerësohet me sistemin prej dhjetë notash 1,2,3,4,5,6,7,8,9,10. Nota më e ulët kaluese është nota 5 (pesë). Në procesverbalet e vlerësimit përfundimtar për studentin jo kalues (ngelës) vendoset nota 4 (katër). Në të gjitha format e kontrollit të dijes përdoret sistemi i vlerësimit me pikë, rezultati i të cilit, detyrimisht kthehet në notë.

## **Neni 12**

### **Administrimi i dokumentacionit të provimeve**

- a) Në fund të çdo provimi, testet dhe çdo material i provimit dorëzohet në sekretarinë e Departamentit të Biologjisë, mbyllet në një zarf mbi të cilin të jenë shkruar të gjitha të dhënat e nevojshme dhe firmosen nga lektori.
- b) Zarfet me testet e provimeve të arkivuara në sekretarinë e Departamentit, mund të hapen dhe të kontrollohen vetëm në rast ankimi ose shihet e arsyeshme nga autoritetet drejtuese. Këto materiale ruhen deri në fund të provimeve të semestrit pasardhës e më pas ato digjen.
- c) Ndalohet hyrja në provim e personave të jashtëm, me përjashtim të Drejtuesit të Njesisë Bazë të Biologjisë, autoriteteve drejtuese të Fakultetit e personave të tjerë të autorizuar me shkrim nga Dekani ose Rektori për të kryer kontroll.
- d) Departamenti i Biologjisë mund të propozojë ngritjen e një komisioni për mbikqyrjen e procesit të provimeve.

## **Neni 13**

### **Ankimi për rezultatin përfundimtar**

- a) Bazuar në nenin 62, të Rregullores së Universitetit "Ismail Qemali" Vlorë, studenti ka të drejtë të ankoheret për rezultatin përfundimtar të provimit. Ankesa i paraqitet me shkrim Drejtuesit të Njesisë Bazë të Biologjisë brenda 48 orëve nga marrja në dijeni e rezultatit të provimit, i cili bën verifikimet e duhura dhe kur e gjen të pamundur zgjidhjen e ankesës, vë menjëherë në dijeni Dekanin.
- b) Dekani, brenda 48 orësh nga marrja dijeni për ankesën nga Drejtuesi i Njesisë Bazë, ngre një komision ad-hoc i cili bën verifikimin e pretendimeve të studentit. Me miratim të Dekanit, komisioni përcakton vlerësimin përfundimtar të provimit.
- c) Ndryshimet në rezultatet e studentëve pasqyrohen në procesverbalin e ri të firmosur nga komisioni i cili i bashkëlidhet procesverbalit të mëparshëm dhe në Sistemin e Menaxhimit të Informacionit Univlora (SMI-Univlora).

## **Neni 14**

### **Përmirësimi i notës**

Bazuar në nenin 63, të Rregullores së Universitetit "Ismail Qemali" Vlorë.

- a) Studentët e ciklit të parë të studimeve kanë të drejtë të përmirësojnë notën në çdo lëndë, por jo më shumë se katër përmirësime gjatë gjithë periudhës së studimeve dhe jo më shumë se dy përmirësime në një vit akademik.
- b) Përmirësimet e notës bëhen vetëm në semestrin e verës, sezonin e riprovimeve të dimrit si dhe në datat e përcaktura nga Dekani i Fakultetit para mbrojtjes së diplomës. Është detyra e tij të regjistrohet në kurset që do të përmirësojë notën, pasi më parë ka bërë kërkesën në sekretarinë e Departamentit, e cila e përcjell informacionin tek Drejtoria e IT-së për të bërë të mundur aksesin e studentit në regjistrimin e kursit. Kërkesa bëhet të paktën 10 ditë para fillimit të semestrit të verës, sezonit të riprovimeve të dimrit dhe mbrojtjes së diplomës.
- c) Studenti ka të drejtë të kërkojë përmirësimin e notës së një lënde jo më shumë se një herë.
- d) Studentët duhet të jenë në dijeni se mbetet në fuqi nota e përsëritjes së fundit, e cila do të pasqyrohet në transkriptin e notave që tregon ecurinë akademike të studentit, pavarësisht nëse kjo është nota më e lartë apo jo.
- e) Nëse nota e përsëritjes së fundit është 4 (katër) rregullat akademike për shlyerjen e detyrimeve nuk ndryshojnë.
- f) Në listën e notave që shoqërojnë diplomën do të pasqyrohen vetëm notat përfundimare kaluese (5,6,7,8,9,10).

## **Neni 15**

### **Diplomimi**

Bazuar në nenin 65, të Rregullores së Universitetit "Ismail Qemali" Vlorë.

- a) Në përfundim të kursit të plotë të programit të studimit Bachelor në "Biologji", studentët kanë të drejtë të diplomohen. Kërkesat e diplomimit janë paraqitur në kurrikulën e programit të studimit Bachelor në "Biologji".
- b) Sekretaria mësimore e Departamentit të Biologjisë është e detyruar t'i përcjellë me shkresë të veçantë Drejtuesit të Njesisë Bazë dhe Dekanit të Fakultetit listën e studentëve që kanë plotësuar detyrimet e një program studimi dhe çdo detyrim tjetër financiar të cilët kanë të drejtën e mbrojtjes së tezës së diplomës. Sekretaria mësimore mban Përgjegjësi për saktësinë e të dhënave.
- c) Drejtuesi i Njesisë Bazë të Biologjisë, pas marrjes së listës së studentëve ngre një komision ad-hoc, i cili verifikon nëse këta studentë kanë plotësuar detyrimet e programit të studimit. Pas verifikimit lista

- e studentëve që kanë të drejtën e mbrojtjes së tezës së diplomës, e firmosur nga anëtarët e komisionit, i përcillet Drejtuesit të Njesisë Bazë.
- d) Në përfundim të programit të studimeve të ciklit të parë, parashikohet një provim diplomimi me shkrim, me gojë (ose e kombinuar) ose përgatitja e një teme diplome në varësi të notës mesatare të studentit deri në përfundim të semestrit të parafundit. Nota mesatare minimale, që i jep të drejtën studentit për mbrojtjen e diplomës, me provim përfundimtar apo punim diplome, caktohet nga Departamenti dhe miratohet nga Senati Akademik.
  - e) Udhëheqësit e temave të diplomës propozojnë temat përkatëse, të cilat miratohen nga Drejtuesi i Njesisë Bazë.
  - f) Mbrojtja e diplomës bëhet e hapur. Procedura e mbrojtjes përfshin një provim me shkrim, me gojë (ose e kombinuar) ose përgatitja e një teme diplome. Për të realizuar vlerësimin e studentëve, ngrihet komisioni i përbërë nga 5 (pesë) anëtarë, që miratohet nga Drejtuesi i Njesisë Bazë të Biologjisë. Në përfundim, komisioni bën vlerësimin me notë. Shlyerja e detyrimeve të programit të studimit dhe çdo detyrimi tjetër financiar dhe material kundrejt Universitetit, është kusht paraprak për kryerjen e mbrojtjes së tezës së diplomës. Në përfundim, komisioni bën vlerësimin me notë për secilin student të përfshirë në mbrojtjen e diplomës.
  - g) Drejtuesi i Njesisë Bazë i përcjell Dekanit të Fakultetit listën e studentëve të diplomuar. Dekani nëpërmjet një shkrese ia përcjellë këtë listë Zyrës së Regjistrimit për të përgatitur diplomat përkatëse.
  - h) Në raste të veçanta, kur studentët kanë vetëm një lëndë të pashlyer, të cilën e kanë frekuentuar dhe kanë vlerësimin me notën 4 (katër) ose shënimin "NP", Dekani i Fakultetit përkatës cakton data të posaçme për provime, përpara datës së përcaktuar për mbrojtjen e tezës së diplomës.
  - i) Diplomimi në programin e studimit Bachelor në "Biologji" bëhet gjatë gjithë vitit akademik, datat dhe afatet përcaktohen nga Dekani i Fakultetit, duke mos krijuar pengesa në kohë për studentët që diplomohen.
  - j) Kandidati që vlerësohet negativisht (nota 4) në mbrojtjen e diplomës, ka të drejtë të riparaqitet për mbrojtje në një datë të caktuar nga Dekani i Fakultetit në semestrin pasardhës.

## **Neni 16**

### **Procedura e provimit të diplomës**

- a) Bazuar në Vendimin e Senatit Akademik nr. 9, datë 26.01.2017, në shkresën nr. 532/1 Prot., datë 10.04.2017, të Rektorit të Universitetit "Ismail Qemali" Vlorë, provimi i diplomimit të studentëve të Ciklit të Parë të programit të studimit Bachelor në "Biologji", të cilët nuk plotësojnë kriterin e notës mesatare 9.00 (nëntë), do të zhvillohet me shkrim ose me gojë.
- b) Banka e pyetjeve për diplomimin në programin e studimit Bachelor në "Biologji" do të jetë nga lëndët me kodin BIO.
- c) Për çdo lëndë do të zgjidhen disa pyetje nga pedagogët e lëndëve përkatëse, të cilat do t'i dorëzohen Drejtuesit të Njesisë Bazë të Biologjisë.
- d) Programi i diplomimit, me temat kryesore mësimore, do t'u vihet në dispozicion studentëve në semestrin e dytë të vitit të tretë të studimeve në programin e studimit Bachelor në "Biologji", sipas mënyrës së parashikuar në Rregulloren e Universitetit "Ismail Qemali" Vlorë, për dhënien e informacionit.
- e) Tezat do të përgatiten ditën e provimit nga Komisioni i Provimit dhe do të firmosen nga Drejtuesi i Njesisë Bazë të Biologjisë.
- f) Studenti ka të drejtë ta ndërrojë tezën deri në dy herë dhe për çdo ndërrim teze do t'i ulen dy nota.

- g) Në rastin kur provimi i diplomimit do të realizohet me gojë, studentit do t'i jepet mundësia të përgatitet për tezën përkatëse për 20 minuta, dhe pas këtij afati, studenti do të përgjigjet me gojë për pyetjet që përmban teza.
- h) Çdo anëtar i komisionit jep vlerësimin përkatës për çdo student, dhe vlerësimi final i studentit do të jetë mesatarja e thjeshtë aritmetike e vlerësimeve të 5 anëtarëve të Komisionit të Provimit të Diplomës.
- i) Të gjitha procedurat e tjera të diplomimit do të zhvillohen sipas rregullores së Universitetit "Ismail Qemali" Vlorë dhe rregullores së Departamentit të Biologjisë.

## **Neni 17**

### **Pajisja me diplomë**

Bazuar në nenin 66, të Rregullores së Universitetit "Ismail Qemali" Vlorë:

- a) Studentët që kanë plotësuar detyrimet e një programi studimi dhe çdo detyrim tjetër financiar dhe material kundrejt Universitetit pajisen me diplomë e cila është një dokument zyrtar.
- b) Diploma e Programit të Ciklit të Parë të studimeve Bachelor në "Biologji" shoqërohet me listën e Notave (në listën e notave që shoqërojnë diplomën pasqyrohen vetëm notat përfundimtare kaluese  $\geq 5$  të çdo lënde) dhe me suplementin e diplomës. Suplementi i Diplomës hartohet në përputhje me kërkesat e hapësirës Europiane të Arsimit të Lartë. Ai përshkruan në veçanti, natyrën, nivelin, përmbajtjen, rezultatet e studimeve që janë kryer dhe përfunduar me sukses nga mbajtësi i diplomës.
- c) Përmbajtja dhe forma e diplomës është e përcaktuar në Udhëzimet e Ministrisë së Arsimit Sportit dhe Rinisë. Diploma nënshkruhet prej Dekanit të Fakultetit të Shkencave Teknike dhe Rektorit të Universitetit "Ismail Qemali" Vlorë. Për secilin prej tyre shënohet emri, mbiemri, grada dhe titulli shkencor. Nënshkrimi i Rektorit shoqërohet me vulën e Universitetit "Ismail Qemali", Vlorë.
- d) Për këtë program të ciklit të parë të studimeve lëshohet diploma: Diplomë Bachelor në "Biologji".

## **Neni 18**

### **Tërheqja e diplomës**

Bazuar në nenin 67, të Rregullores së Universitetit "Ismail Qemali" Vlorë:

- a) Tërheqja e diplomës bëhet personalisht nga i diplomuari, kundrejt nënshkrimit dhe evidentohet në regjistrin përkatës.
- b) Nëse prania e të diplomuarit është objektivisht e pamundur, tërheqjen e diplomës mund t'a bëjë një nga pjesëtarët e familjes, i pajisur me prokurë të posaçme e cila bashkëngjitet në regjistrin e tërheqjes së diplomave, duke paraqitur dhe një dokument identifikimi të tij.
- c) Nëse diploma nuk është plotësuar në rregull, i interesuari duhet të mos e tërheqë atë dhe të kërkojë pajisjen me diplomë të rregullt. Nëse i interesuari e tërheq diplomën e parregullt, në rast se i humbet origjinali ose i dëmtohet duke iu bërë i papërdorshëm, Universiteti nuk lëshon dublikatë. Lejohet vetëm dhënia e listës së notave të fituara dhe vërtetim me fotografi i cili është ekuivalent me diplomën, pasi nënshkruhet nga Rektori i Universitetit, Dekani dhe Përgjegjësi i zyrës së regjistrimit. Nënshkrimet e tyre vërtetohen me vulën e Universitetit "Ismail Qemali" Vlorë. Diploma e plotësuar në mënyrë të parregullt, asgjësohet me një komision të përbërë prej tre anëtarësh të caktuar me urdhër të Dekanit me hartimin e procesverbalit përkatës, i cili depozitohet në zyrën e regjistrimit, përpara se i interesuari të pajiset me vërtetim me fotografi ekuivalent me diplomën.

- d) Në Universitetin "Ismail Qemali" Vlorë, dorëzimi i diplomave bëhet me ceremoni të përgjithshme për të gjithë Fakultetet në shkallë Universiteti dhe dorëzimi i diplomave bëhet personalisht nga Rektori, në prani të përfaqësuesve të Senatit Akademik, të profesoratit, administratës dhe studentëve.

## **KREU IV TË DREJTAT DHE DETYRIMET E STUDENTËVE**

### **Neni 19 Të drejtat e studenteve**

Të drejtat dhe detyrimet e studentëve janë të parashikuara në nenin 70 të Rregullores së UV, 2014, ndërsa shkeljet disiplinore nga studentët parashikohen në nenin 74 të po kësaj rregulloreje.

Studenti ka të drejtë:

- a. Të ndjekë leksione, seminare dhe të gjitha veprimtaritë e tjera mësimore, të organizuara në përputhje me statusin e tij.
- b. Të përdorë pajisjet, bazën materiale dhe laboratorike të Universitetit sipas rregullave përkatëse, për të realizuar programin mësimor dhe punën e programuar në aktivitetin e tij shkencor, bibliotekën dhe mjediset sportive e kulturore të universitetit.
- c. Të zgjedhë dhe të zgjidhet në organet drejtuese, si në Senatit Akademik, në Bordin e Administrimit, ku janë të regjistruar, në përputhje me ligjin për arsimin e lartë dhe Statutin e Universitetit.
- d. Të organizohet në shoqata të ndryshme jopolitike në përputhje me aktet ligjore e nënligjore përkatëse.
- e. Të përfitojë bursë studimi brenda ose jashtë shtetit kur plotëson kushtet e përcaktuara me vendim të Këshillit të Ministrave, Senatit e në marrëveshjet ndërshtetërore ose ndëruniversitare.
- f. Të përfitojë shpërblime të veçanta që akordohen nga Universiteti "Ismail Qemali" Vlorë sipas ligjit dhe kriterëve të caktuara nga Senati Akademik.
- g. Të shprehë opinionin e tij për cilësinë e mësimdhënies dhe punën e personelit akademik të Universitetit.
- h. Të ankohet për shkelje të rregullave dhe standarteve akademike nga ana e pedagogëve, mosrealizimin e procesit të mësimdhënies, rregullat për zhvillimin e provimit dhe për vlerësimin e tij.
- i. Të ankohet për shkelje të etikës akademike, të konfliktit të interesit dhe të çdo rasti tjetër që cënon integritetin e studentit.
- j. Të ndjekë studimet në një degë të dytë, në sistem të ndryshëm nga ai që ndjek, sipas përcaktimeve në këtë rregullore, në vendimet e Senatit apo në aktet e posaçme të Ministrisë së Arsimit Sportit dhe Rinisë.

Të drejta të tjera të studenteve janë përcaktuar në Ligjin Nr. 80/2015 “Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë”, në Statutin (2019) dhe në Rregulloren (2014) të UV.

## **Neni 20**

### **Detyrimet e studentëve**

Studenti duhet:

- a. Të njihet me Statutin, Rregulloren e Universitetit dhe çdo Rregullore tjetër e detyrimet që linden për të dhe të jetë i vetëdijshëm për zbatimin e tyre, në të kundërt, Universiteti nuk mban përgjegjësi për pasojat që mund të rrjedhin nga mosnjohja e tyre.
- b. Të njihet me të gjitha kërkesat e përgjithshme të Universitetit, si dhe kërkesat specifike të programit të studimit Bachelor në "Biologji".
- c. Të zbatojë të gjitha rregullat që rrjedhin nga Statuti i Universitetit "Ismail Qemali" të Vlorës, nga kjo rregullore dhe nga çdo akt tjetër ligjor e nënligjor për arsimin e lartë.
- d. Të respektojë Kodin e Etikës së Universitetit.
- e. Të shlyejë detyrimet e përcaktuara në programin e studimit Bachelor në "Biologji" si dhe çdo detyrim tjetër financiar dhe material ndaj Universitetit.
- f. Të shlyejë të gjitha detyrimet financiare të parashikuara në ligj.
- g. Të mbajë përgjegjësi për shkeljet e rregullave të Universitetit nga ana e tij; dëmet materiale që ai mund të ketë bërë zhdëmtohen në masën e përllogaritur.

Detyra apo përgjegjësi të tjera të studentëve janë përcaktuar në Ligjin Nr. 80/2015 "Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë", në Statutin (2019) dhe në Rregulloren (2014) të UV.

## **Neni 21**

### **Përgjegjësi të tjera të studentëve**

Përgjegjësitë e studentit përfshijnë ndër të tjera edhe pikat më poshtë:

- a. Studenti duhet të njohë dhe të respektojë rregullat e zhvillimit të orës së mësimi të përcaktuara në syllabus dhe të komunikuar në auditor nga pedagogu.
- b. Studenti duhet t'i drejtojë ankesat akademike në lidhje me zhvillimin e procesit mësimor tek autoritetet drejtuese.
- c. Studenti duhet të respektojë oraret e konsultimeve të komunikuar nga pedagogu.

## **Neni 22**

### **Masat disiplinore për studentët**

Shkelje e rregullave të Universitetit konsiderohen të gjitha veprimet e kryera nga ana e studentit që çenojnë personalitetin e personelit akademik, të çdo punonjësi tjetër të universitetit dhe çdo student, normat etiko-morale të shoqërisë si kopjimi në provime, falsifikimi i dokumentave të ndryshme, fyerjet, sharjet, aktet e rrugaçerisë, etj., kur këto veprime nuk mbartin elementë të veprës penale. Ndaj studentit që kryen këto veprime, merren këto masa disiplinore:

- a) Vërejtje me shkrim;
- b) Paralajmërim për pezullim ose përjashtim nga Universiteti;
- c) Pezullimin nga Universiteti për një semestër ose një vit;
- d) Përjashtim nga Universiteti "Ismail Qemali", Vlorë;
- e) Përjashtim përgjithmonë nga Universiteti "Ismail Qemali", Vlorë.

Vendimin për "Vërejtje me shkrim", "Paralajmërim për pezullim ose përjashtim nga Universiteti" dhe "Pezullim nga Universiteti për një semester ose një vit" e merr Dekanati përkatës. Në raste të veçanta të parashikuara në Kodin e Etikës këto vendime mund të merren nga Rektorati.

Vendimin për "Përjashtimin nga Universiteti "Ismail Qemali", Vlorë" (heqje vetëm e së drejtës së studimit të filluar) dhe "Përjashtimin përgjithmonë nga Universiteti "Ismail Qemali", Vlorë (duke mos i lejuar të fitojë të drejta studimi të mëpasshme) e merr Rektorati i Universitetit "Ismail Qemali" Vlorë, mbi bazën e propozimit të Dekanatit.

Studenti konsiderohet i rehabilituar, nëse nuk bën shkelje tjetër me kalimin e tre muajve për vërejtjen, brenda gjashtë muajve për paralajmërimin dhe një viti për pezullimin.

## **KREU V KOMUNIKIMI**

### **Neni 23 Rregullat e sjelljes akademike**

Të gjithë anëtarët e stafit akademik në Universitetin "Ismail Qemali", Vlorë duhet të praktikojnë dhe të ruajnë standartet e integritetit akademik dhe ndershmërisë. Integritet akademik do të thotë të paraqesësh vetveten dhe punën tënde me ndershmëri. Më poshtë janë disa shembuj pandershmërie akademike:

- a. Mashtrim në provime. Këtu përfshihet: përdorimi i materialeve si libra dhe/ose shënime në formë të printuar apo elektronike kur një gjë e tillë nuk është e autorizuar nga pedagogu, kopjimi nga testimi apo detyra e dikujt tjetër, lejimi i dikujt tjetër për të kopjuar punën tënde, zëvendësimi i punës tënde me punën e dikujt tjetër, ose të tjera forma shkeljesh në sjellje gjatë provimeve.
- b. Plagjiaturë e punës së të tjerëve. Plagjiaturë do të thotë të përdorësh punën ose idetë e dikujt tjetër duke i konsideruar ato të veta.
- c. Falsifikimi i dokumentave apo paraqitja dizinformuese e kredencialeve të një personi tjetër.

Pedagogët duhet të respektojnë standartet e mëposhtme në kontekstin e sjelljes akademike:

- a. Të informojnë dhe të udhëzojnë studentët mbi procedurat dhe standartet e punës kërkimore, si dhe mbi dokumentacionin e kërkuar për të kryer detyra në një kurs të caktuar apo në kontekstin e një disipline të caktuar.
- b. Të ndërmarrin hapa konkretë për të dalluar dhe parandaluar mashtrimin.
- c. Të raportojnë sjelljen akademike të dyshuar jo etike tek Dekani.
- d. Të paraqesin evidencë të plagjiaturës, të mashtrimit në provime apo raporte laborator, të fallsifikimeve të dokumentave apo të tjera forma sjelljeje të pandershme akademike në autoritetet drejtuese përkatëse.

Studentët duhet të respektojnë standardet e mëposhtme në kontekstin e sjelljes akademike:

- a. Të jenë në dijeni të praktikave dhe standardeve të shkollimit të ndershëm.
- b. Të ndjekin udhëzimet e pedagogëve në lidhje me provimet dhe detyrat në mënyrë që të evitojnë një paraqitje të keqe të punës.

### **Neni 24 Normat etike gjatë komunikimit Personel Akademik – Student**

Gjatë veprimtarisë së mësimdhënies shpesh vihen re problematika rreth koordinimit të punës së stafit me studentët. Për këtë qëllim kjo Rregullore sugjeron të ndiqen disa udhëzime praktike të miratuara si më poshtë:

- a) Studenti është i detyruar të zbatojë e respektojë Kodin e Etikës të miratuar në UV.
- b) Kontakti i pedagogut me studentin për aspekte të mësimdhënies apo kërkimit shkencor do të bëhet vetëm në ambientet e auditoreve, laboratoreve dhe në asnjë rast jashtë tij.
- c) Komunikimi me studentin mund të bëhet në rrugë elektronike në adresën e pedagogut, e cila është regjistruar më parë në Departament.
- d) Justifikimet nga ana e studentëve tek pedagogu për mungesat gjatë vitit pranohen vetëm pas dorëzimit të raporteve të marrë nga komisione të posaçëm.
- e) Në rast të vonesave të pedagogut në auditor studentit duhet të presë 15 minuta dhe nëse pedagogu nuk ka njoftuar paraprakisht ai mund të largohet.
- f) Në auditor, laboratorë si dhe gjatë provimit nuk lejohet përdorimi i mjeteve të komunikimit.
- g) Në ditën e provimit studentit respekton me përpikmëri datën, vendin (sallën) e provimit, si dhe siguron mjetet e nevojshme për të (stilolaps, makinë llogaritëse, mjet identifikimi).
- h) Në ambjentet e provimit nuk lejohet prania e familjarëve të studentit përveçse personave të autorizuar nga ana e Drejtuesit të Njesisë Bazë (pedagogë, sekretare).
- i) Pedagogu j'ua komunikon notën studentëve duke respektuar konfidencialitetin (në mungesë të sistemit) ose bën verifikime të vlerësimit në një orar e sallë të caktuar.

## **Neni 25** **Çështje akademike**

Çdo njësi akademike duhet të respektojë procedurat për zgjidhjen e ankesave, në lidhje me vlerësimin, standartin dhe cilësinë e mësimdhënies, situatat brenda në auditor dhe çdo problem tjetër akademik. Për rastet e ankesave në lidhje me vlerësimin, ndiqet ajo procedurë e përcaktuar në nenin 62 të rregullores së UV.

## **Neni 26** **Çështje jo akademike**

Personeli i Universitetit dhe studentët mund të hasin situata problematike gjatë kohës së punës apo të studimeve në Universitetin "Ismail Qemali", Vlorë në të cilat mund të përfshihen rastet e fyerjeve, sharjeve ose konfrontimeve fizike. Qëndrimi diskriminues apo ngacmimi seksual, sharjet apo fyerjet raciste, sharjet për orientimin seksual, për ngjyrën, fenë, bindjet, origjinën kombëtare apo prejardhjen, gjendjen martesore, gjendjen familjare etj., kërkojnë vëmendje të veçantë në zgjidhjen e tyre.

## **KREU VI** **DISPOZITA KALIMTARE DHE TË FUNDIT**

### **Neni 27** **Rishikimi dhe përditësimi**



Çdo çështje që lind nga zbatimi i kësaj rregulloreje dhe nuk mbulohet prej saj, rregullohet me Rregulloren e Brendshme të Universitetit. Në rast se edhe kjo e fundit nuk e mbulon, atëherë Departamenti i Biologjisë i propozon Rektorit dhe Senatit Akademik propozimin përkatës për miratim. Departamenti i Biologjisë ka të drejtën dhe detyrimin e rishikimit periodik të kësaj rregulloreje, dhe përcjelljen për miratim në Senatin Akademik.